

30 APR 1999

TOLAK MEREKA YANG SALAHGUNAKAN MASJID, KATA DR MAHATHIR

ALOR SETAR, 30 April (Bernama) -- Perdana Menteri Datuk Seri Dr Mahathir Mohamad hari ini mengulangi seruan supaya umat Islam di negara ini menolak golongan yang menggunakan masjid sebagai tempat untuk melemparkan fitnah dan memaki hamun.

Berucap pada majlis kesyukuran di Masjid Al-Ghufran di sini sempena kepulangannya daripada menunaikan ibadah haji baru-baru ini, beliau berkata masjid sepatutnya digunakan untuk melakukan ibadah.

"Masjid adalah tempat untuk merapatkan hubungan persaudaraan dan perpaduan sesama Islam...bukannya dijadikan tempat untuk memaki hamun dan memfitnah demi mencapai matlamat politik," katanya.

Perdana Menteri berkata perbuatan itu tidak sejajar dengan ajaran Islam yang berlandaskan kepada Al-Quran dan Hadis.

Dr Mahathir berkata perpaduan akan menjadi lebih kuat jika ajaran Islam diamalkan sepenuhnya dan ini akan menjadi sumber kekuatan bagi menghalang pihak-pihak yang cuba menghancurkan negara ini.

Masjid berharga RM5.5 juta mula dibina tahun lepas dan siap bulan lepas.

Turut hadir ialah isteri Perdana Menteri, Datin Seri Dr Siti Hasmah Mohd Ali dan Menteri Besar Tan Sri Sanusi Junid.

-- BERNAMA

MAN JM PR